

## QASDDAN BADANGA O'RTACHA OG'IR SHIKAST YETKAZISH JINOYATINI TERGOV QILISHNI TAKOMILLASHTIRISH

Agzamov Bekzod Yunusovich

O'zbekiston Respublikasi Huquqni muhofaza qilish akademiyasi "Tergov faoliyati"  
mutaxassisligi bo'yicha magistratura tinglochchisi.

E-mail: [agzamov.bekzod@list.ru](mailto:agzamov.bekzod@list.ru); Phone: +99897 720-35-30

<https://doi.org/10.5281/zenodo.1166996>

*Annotatsiya.* Maqolada qasddan badanga o'rtacha og'ir shikast yetkazish jinoyatini tergov qilishni takomillashtirish misollar orqali tahlil qilingan. Tahlillar asosida ushbu jinoyatni yanada takomillashtirish bo'yicha takliflar ishlab chiqilgan.

*Kalit so'zlar:* O'zbekiston Respublikasining Jinoyat kodeksi, jinoyat, jazo, jazoni yengillashtiruvchi holatlar, huquqni muhofaza qilish organlari, tergov faoliyati, badanga o'rtacha og'ir shikast yetkazish, takomillashtirish.

### IMPROVING THE INVESTIGATION OF MODERATE BODY INJURY

*Abstract.* The article analyzes the improvement of the investigation of the crime of moderate serious bodily injury through examples. Proposals for further improvement of this crime have been developed based on the analysis.

**Key words:** The Criminal Code of the Republic of Uzbekistan, crime, punishment, mitigating circumstances, law enforcement agencies, investigative activities, moderately serious bodily injury, improvement.

### СОВЕРШЕНСТВОВАНИЕ РАССЛЕДОВАНИЯ УМЕРЕННЫХ ТРАВМ ТЕЛА

**Аннотация.** В статье на примерах анализируется совершенствование расследования преступлений с причинением средней тяжести телесных повреждений. На основе анализа разработаны предложения по дальнейшему совершенствованию данного преступления.

**Ключевые слова:** Уголовный кодекс Республики Узбекистан, преступление, наказание, смягчающие обстоятельства, правоохранительные органы, следственные действия, причинение телесных повреждений средней тяжести, улучшение.

### KIRISH

O'zbekiston jamiyat rivojlanishining hozirgi zamon bosqichida inson, uning qadr-qimmati, huquq va erkinliklari oliy qadriyat sifatida tan olingan. Inson huquqlari, uning ustuvorligi jamiyatda yashash qoidalariga rioya etishda fuqarolar o'rtasida xayrixoh munosabatlar yo'lga qo'yilishini, voyaga yetib kelayotgan avlodni tarbiyalashda g'amxo'rلarcha munosabatda bo'lishni, aholi salomatligini ta'minlovchi shart-sharoitlar yaratib berishni zaruratga aylantiradi. Bu esa, o'z navbatida, fuqarolar tomonidan jamiyatdagi xulq-atvor, xavfsizlik qoidalariga va aholi salomatligini saqlashga qaratilgan qoidalarga rioya etilishini taqozo qiladi. Darhaqiqat, o'z istiqlol va taraqqiyot yo'liga ega bo'lgan yurtimizda inson huquqlarini kafolatlovchi ko'plab me'yoriy hujjatlar qabul qilinib, amalda o'z ijrosini topmoqda.

Shu bilan bir qatorda, sud-huquq sohasidagi islohotlarning ham asosiy maqsadi, inson huquq va erkinliklarni mustahkamlashga qaratilgandir.

Prezidentimiz ta'kidlaganidek, "Mamlakatimizni demokratik yangilashning bugungi bosqichidagi eng muhim yo'nalishlaridan biri bu - qonun ustuvorligi va qonuniylikni mustahkamlash, inson huquqi va manfaatlarini ishonchli himoya qilishga qaratilgan sud-huquq tizimini izchil demokratlashtirish va liberallashtirishdan iboratdir"<sup>1</sup>. Shu o'rinda aytish mumkinki, sud-huquq tizimini isloh qilish o'z navbatida, jinoyat qonunchiligini takomillashtirish va liberallashtirishga qaratilgan bir qancha vazifalarini amalga oshirishni ham taqozo etadi. Bu vazifalar qatoriga jinoyat qonunchiligidagi belgilangan jamoat tartibi jinoyatlar uchun javobgarlik asoslari va uning o'ziga xos xususiyatlarini oydinlashtirish ham kiradi.

Qonuniylikni ta'minlash, jinoyatlarni o'z vaqtida fosh etish, har tomonlama, to'la va xolisona tergov qilish, javobgarlikning muqarrarligi prinsipini so'zsiz amalga oshirishning samarali mexanizmini yaratish maqsadida ichki ishlar organlarining jinoyatlarni tergov qilish sohasidagi faoliyatini tubdan takomillashtirish, tergov jarayonida fuqarolar huquqlari, erkinliklari va qonuniy manfaatlarini ishonchli himoya qilinishini ta'minlash eng muhim vazifa hisoblanadi.

O'zbekiston Respublikasining hozirgi taraqqiyot bosqichida. Vatan ravnaqi yo'lida fidokorona mehnat qilish, iqtisodiy, siyosiy, ijtimoiy va madaniy muammolarni hal etish, porloq istiqbolga erishishga intilish jamiyat hayotining asosiy mazmuniga aylangan. Mustaqillik yillarda O'zbekistonda sud-huquq tizimini demokratlashtirishga, jinoyat, jinoyat-protsessual qonunchiligini liberallashtirishga, inson huquqlari va erkinliklari puxta himoya qilinishini ta'minlovchi mustaqil sud hokimiyatini shakllantirishga yo'naltirilgan keng ko'lamli ishlar amalga oshirildi. Ushbu islohotlar esa, o'z navbatida, fuqarolarning sud orqali himoyalanish huquqlarini yanada samarali ta'minlash va advokatura rolini oshirish, jamiyatni demokratlashtirish va himoyalash, mamlakatni isloh qilish va modernizatsiyalash jarayonlarini jadallashtirish imkonini berdi. Qonunlarni amalga oshirish uchun respublikamiz fuqarolarining huquqiy ongini, huquqiy madaniyatini, huquqiy mafkurasini yuksaltirish zarur. Respublikamiz aholisining, ayniqsa, yosh avlodning huquqiy bilim saviyasini yuqori darajaga ko'tarish bilan biz qonun buzishlarning, adolatsizliklar, jinoyatlarning oldini olamiz. Qonunlarga rioya etishimiz, ularni hurmat qilishimiz oilamizni, davlatimizni mustahkamlashga asos bo'ladi. Zero, shuni aytib o'tish lozimki, har bir fuqaro iqtisodiy va siyosiy islohot o'tkazish davrida qayerda bo'lmasin, xizmat qilmasin, har qadamda huquqiy bilimga ehtiyoj sezadi. Bugungi kunda qonunchilik normalarini erkinlashtirish va yangilash, sud organlari faoliyatining tashkiliy shakllarini takomillashtirish bo'yicha rivojlangan demokratik mamlakatlar tajribasini har tomonlama chuqur o'rganib chiqish dolzarb vazifa bo'lib qolmoqda. Bayon etilgan fikrlar jinoyat ishini yuritishda tergov organlarining insonga, uning huquq va erkinliklariga munosabati tubdan o'zgarayotganidan dalolat beradi. Shu bilan birga, qonunchilikka ushbu o'zgartishlarning kiritilishi bilan mavjud muammolarning barchasi o'z yechimini topdi, deyish to'g'ri bo'lmaydi.

Zero, keljakda, ijtimoiy hayotning ehtiyojlaridan kelib chiqqan holda, qonunchilik yanada takomillashtirilib borishini inkor etib bo'lmaydi. Qasddan badanga o'rtacha og'ir shikast etkazish jinoyatlari yuzasidan olib boriladigan dastlabki tergovning har tomonlama, to'la va xolisona o'tkazilishini, jinoyatning sabablari va sodir etilishiga imkon bergen shart-sharoitlarni sinchkovlik

<sup>1</sup>Tanqidiy tahlil, qattiq tartib intizom va shaxsiy javobgarlik har bir rahbar faoliyatining kundalik qoidasi bo'lishi kerak. Sh.M.Mirziyoyev 56-bet.

bilan tekshirish masalalari hozirgi kunda dolzarb muammo hisoblanadi. Bu borada ayniqsa, tergovni puxta rejalshtirish, tusmollarni to‘g‘ri tuzish va ular bo‘yicha vazifalarni aniq belgilab olish, o‘tkaziladigan ekspertizalarni talab darajasida o‘tkazilishini yo‘lga qo‘yish, surishtiruv organlari bilan samarali hamkorlik qilish, o‘tkaziladigan tergov harakatlarining sifatini oshirish, jinoyatning sodir etilish sabab va shart-sharoitlarini aniqlash ichki ishlar organlari oldida turgan dolzarb vazifa sanaladi. Hozirgi kunda amaliyotda qasddan badanga o‘rtacha og‘ir shikast etkazish jinoyatlarini tergov qilish bilan bog‘liq quyidagi bir qator kamchiliklar ko‘zga tashlanadi:

-ushbu turdag'i jinoyatlarni tergov qilish davomida zamonaviy ekspertiza imkoniyatlaridan foydalanish samaradorligining yuqori emasligi;

- jinoyat ishi bo‘yicha o‘tkaziladigan tergov harakatlari rejasing nomiga tuzilishi;
- ish bo‘yicha aniqlanishi lozim bo‘lgan holatlarning to‘laligicha tekshirilmasdan qolishi;
- yuzaga kelgan tipik tergov vaziyatlarining to‘g‘ri baholanmasligi.

Qasddan badanga o‘rtacha og‘ir shikast etkazish jinoyatlarini tergov qilish bilan bog‘liq yuqorida qayd etilgan muammolarning mavjudligi hamda mazkur faoliyatni takomillashtirish zarurligi ushbu mavzuning dolzarbligini belgilaydi.

Jahonda qasddan badanga shikast etkazish bilan bog‘liq qilmishlarning shaxs hayoti, sog‘lig‘i, erkinligi, sha’ni va qadr-qimmatiga tahdid solayotgan jinoyatlar sifatidagi ijtimoiy xavfi keskin ortib borayotgani bizga ma’lum. Hozirgi kunda sodir etilgan jami jinoyatlarning salkam o‘ttiz besh foizini qasddan badanga shikast etkazish bilan bog‘liq ijtimoiy xavfli qilmishlar tashkil etmoqda. E’tiborni jalb qiladigan tomoni, ushbu turdag'i jinoyatlarning uchdan bir qismi rasmiy ro‘yxatga olinmaydi. Ro‘yxatga olingenlarning salkam yarmi esa fosh etilmasdan qolmoqda.

Vaholanki, milliy qonunchiligidan muvofiq sodir etilgan har bir jinoyat tez va to‘liq ochilishi, ularni sodir etgan shaxslarning aybi isbotlanishi, binobarin jinoyatdan jabrlangan har qanday shaxsnинг huquqi muhofaza qilinishi hamda ularga yetkazilgan barcha turdag'i zararlar to‘liq qoplanishi kerak. Bu esa qasddan badanga o‘rtacha og‘ir shikast etkazish jinoyatlariga qarshi kurash va tergov qilish bo‘yicha samarali mexanizmlarni ishlab chiqish masalasiga alohida yondashish zarurati tug‘ilganligini ko‘rsatib turibdi.

Dunyoda qasddan badanga o‘rtacha og‘ir shikast etkazish jinoyatlarini tergov qilishda dispozitiv normalarni qo‘llash doirasini yanada kengaytirish, bu turdag'i qilmishlarga to‘g‘ri huquqiy baho berish, xususan, aybning shakli, shikastning xususiyati, sodir etilgan qilmish bilan kelib chiqqan oqibat o‘rtasida sababiy bog‘lanish mavjudligini aniqlash, jinoyatga tayyorgarlik va suiqasd uchun javobgarlik masalalariga to‘g‘ri yechim topish kabi yo‘nalishlarda ilmiy tadqiqotlar olib borilmoqda. Bunda qasddan badanga o‘rtacha og‘ir shikast etkazish jinoyatlarini fosh etish uchun maxsus bilim va kriminalistik uslublardan foydalanish, isbotlanishi lozim bo‘lgan holatlar doirasini aniqlash va ular bo‘yicha o‘tkazilishi talab etiladigan tergov va protsessual harakatlar ketma-ketligi, ya’ni algoritmini ishlab chiqish, tergov harakatlarini o‘tkazishning yangi taktik usul va imkoniyatlaridan samarali foydalanish, jinoyatlarni tergov qilish faoliyatini samarali tashkil etilishiga to‘sinqilik qiluvchi amaldagi qonunchilikdagi bo‘shliqlarni bartaraf etish dolzarb ahamiyat kasb etmoqda.

O‘zbekiston Respublikasi Prezidentining 2016-yil 21-oktyabrdagi “Sud-huquq tizimini yanada isloh qilish, fuqarolarning huquq va erkinliklarini ishonchli himoya qilish kafolatlarini kuchaytirish chora-tadbirlari to‘g‘risida”gi PF-4850-son, 2017-yil 30-noyabrdagi “Sud-tergov

faoliyatida fuqarolarning huquq va erkinliklari kafolatlarini kuchaytirish bo'yicha qo'shimcha chora-tadbirlar to'g'risida"gi PF-5268-son, 2020-yil 10-avgustdag'i "Sud-tergov faoliyatida shaxsning huquq va erkinliklarini himoya qilish kafolatlarini yanada kuchaytirish chora-tadbirlari to'g'risida" PF-6041-son, 2022-yil 28-yanvardagi 2022 – 2026-yillarga mo'ljallangan Yangi O'zbekistonning taraqqiyot strategiyasi va uni "Inson qadrini ulug'lash va faol mahalla yili"da amalga oshirishga oid davlat dasturi to'g'risida" PF-60-son Farmonlari hamda 2020-yil 3-sentyabrdagi "Sud hokimiyati organlari faoliyatini raqamlashtirish chora-tadbirlari to'g'risida" PQ-4818-son qarori va sohaga oid boshqa normativ-huquqiy hujjatlarda belgilangan vazifalarni amalga oshirishga mazkur dissertatsiya tadqiqoti lozim darajada xizmat qiladi.

**Asosiy qism.** Mamlakatimizda keyingi vaqtarda jinoyatlarni ochish, tergov qilish, ularning oldini olish, shu orqali fuqarolarning xavfsizligini ta'minlash masalalariga jiddiy e'tibor qaratilmoqda. Ma'lumki, mazkur vazifani bajarish huquqni muhofaza qiluvchi organlar zimmasiga yuklatilgan. Bu borada, ayniqsa, ichki ishlar idoralari xodimlari zimmasiga ulkan mas'uliyat yuklangan bo'lib, ular yuqorida qayd etilgan vazifalarni amalga oshirishda salmoqli vazifalarni amalga oshiradilar.

Shu jumladan, dastlabki tergov organlari faoliyatini takomillashtirish maqsadida keyingi paytlarda bir qator tadbirlar amalga oshirildi. Hozirgi kunda amaliyotda eng ko'p uchraydigan qasddan badanga o'rtacha og'ir shikast yetkazish jinoyatlarining sodir etilish usullari hamda ularni tergov qilish metodikasi ham tobora takomillashib bormoqda.

O'zbekiston Respublikasi Prezidentining 2022-yil 28-yanvaridagi PF-60-sonli "2022–2026-yillarga mo'ljallangan Yangi O'zbekistonning taraqqiyot strategiyasi to'g'risida"gi Farmonida<sup>2</sup> eng muhim yo'naliшlardan biri sifatida mamlakatimizda adolat va qonun ustuvorligi tamoyillarini taraqqiyotning eng asosiy va zarur shartiga aylantirish ekanligi ko'rsatib o'tilgani ham bizning yuqoridagi fikrimizni tasdiqlab turibdi.

O'zbekiston Respublikasida demokratiya umuminsoniy prinsiplarga asoslanadi, ularga ko'ra inson, uning hayoti, erkinligi, sha'ni, qadr-qimmati va boshqa daxlsiz huquqlari oliy qadriyat hisoblanadi<sup>3</sup>.

Barchamizga ma'lumki, yuridik adabiyotlarda badanga shikast yetkazishning yagona tushunchasi hanuzgacha ishlab chiqilmagan bo'lib, unga olimlar tomonidan quyidagicha tushunchalar berib o'tilgan.

Badanga shikast yetkazishning tushunchasini yoritib berishdagi farqlar:

- birinchidan, badanga shikast yetkazishlarning obyektini turlicha ta'riflashadi, "ba'zilar bunday obyekt sifatida sog'liqni belgilagan bo'lsalar, boshqalar jismoniy daxlsizlikni belgilaganlar";

- ikkinchidan, urish, do'pposlash, qiyashlarni badanga shikast yetkazishlar jumlasiga kiritish mumkinligidan iborat bo'lgan;

- uchinchidan, bular jumlasiga jismoniy og'riq beruvchi, ammo boshqa oqibatlarni keltirib chiqarmaydigan zo'rlik ishlatib qilingan boshqa harakatlarni kiritish mumkinligidan iborat

<sup>2</sup> O'zbekiston Respublikasi Prezidentining 2022 yil 28 yanvardagi "2022 – 2026 yillarga mo'ljallangan Yangi O'zbekistonning taraqqiyot strategiyasi to'g'risida"gi PF-60-son Farmoni.

<sup>3</sup> O'zbekiston Respublikasi Konstitutsiyasi 13-modda. Elektron manba <https://lex.uz/docs/20596>

bo‘ladi. Badanga shikast yetkazishning obyekti uning holati va xususiy fazilatlaridan qat’i nazar o‘zga kishining sog‘lig‘idir.

Sog‘liqqa qarshi jinoyatlarni har tomonlama chuqur tahlil qilish uchun birinchi navbatda “inson sog‘lig‘i” tushunchasiga alohida to‘xtalib o‘tish maqsadga muvofiq bo‘ladi.

Shuningdek, xalqaro sog‘liqni saqlash tashkiloti tomonidan berilgan ta’rifga ko‘ra, “sog‘liq – bu insonda faqatgina kasalliklar va jismoniy nuqsonlarning yo‘qligi emas, balki insonning to‘liq jismoniy, ma’naviy va ijtimoiy farovon holati hisoblanadi<sup>4</sup>.

Qasddan badanga o‘rtacha og‘ir shikast yetkazish jinoyatlarini sodir etish uchun javobgarlik, gumon qilinuvchining qasdi asosida emas, balki faqat jabrlanuvchiga nisbatan yetkazilgan shikastning xususiyati va og‘irlilik darajasi yuzasidan beriladigan sud-tibbiy ekspertizasi xulosasi asosidagina yuzaga kelishi mumkin. Misol uchun A ismli shaxs B ismli shaxsnинг qo‘lini sindirishni maqsad qilib, qo‘lidagi qattiq jism bilan B ismli shaxsnинг chap qo‘liga zarba berib, uzib tashlasa-yu, lekin uning chap qo‘li protez bo‘ladigan bo‘lsa, A shaxsni qasddan badanga o‘rtacha og‘ir shikast yetkazishga suiqasd qilganligi bilan jinoiy javobgarlikka tortolmaymiz. Chunki A ismli shaxsnинг qilmishi oqibatida B shaxsnинг sog‘lig‘iga zarar yetkazilgan deb baholab bo‘lmaydi.

Badanga yetkazilgan shikastning xususiyati va og‘irlilik darajasini aniqlash, odatda, tibbiyot organlari vakolatiga taalluqli bo‘lib, O‘zbekiston Respublikasi Sog‘liqni saqlash vazirining 2012-yil 1-iyundagi 153-sonli buyrug‘i bilan tasdiqlangan tan jarohatlarining og‘irlilik darajasini sud-tibbiy aniqlash qoidalariga muvofiq o‘tkaziladi. Shu sababli, badanga shikast yetkazilgan har bir holda, JPKning 173-moddasi birinchi qismining 1-bandи talabiga ko‘ra sud-tibbiyot ekspertizasi tayinlanishi va o‘tkazilishi shart bo‘lib, uning xulosasi sud tomonidan qayd etilgan qoidalar va ishning boshqa materiallari asosida JPKning 187-moddasiga binoan baholanishi lozim<sup>5</sup>.

Yetkazilgan tan jarohatlarining og‘irlilik darajasi O‘zbekiston Respublikasi Sog‘liqni saqlash vazirining 153-sonli buyrug‘iga 2-ilova “Tan jarohatlarining og‘irlilik darajasini sud-tibbiy aniqlash qoidalariga”ga asosan o‘tkaziladi. Ekspertiza tayinlash to‘g‘risida tergovga qadar tekshiruvni amalga oshiruvchi organning mansabdor shaxsi, surishtiruvchi, tergovchi qaror, sud esa ajrim chiqaradi<sup>6</sup>.

Yetkazilgan tan jarohatlarining og‘irlilik darajasi O‘zbekiston Respublikasi Jinoyat kodeksi va tan jarohatlarining og‘irlilik darajasini sud-tibbiy aniqlash qoidalarida ko‘zda tutilgan tibbiy mezonlar asosida aniqlanadi. Bunda o‘rtacha og‘ir tan jarohatining quyidagi ko‘rinishlari farqlanadi:

O‘rta og‘irlidagi tan jarohatlari uchun:

- sog‘liqning uzoq, yigirma bir kundan ortiq, ammo to‘rt oydan ko‘p bo‘lmagan muddatga buzilishi;

<sup>4</sup> Устав (Конституция) Всемирной организации здравоохранения (ВОЗ) (Принят в г. Нью-Йорке 22.07.1946) // КонсультантПлюс: справочно-правовая система / ЗАО «КонсультантПлюс». Версия 3000.03.37. URL: . Загл. с экрана. [https://www.who.int/governance/eb/who\\_constitution\\_ru.pdf](https://www.who.int/governance/eb/who_constitution_ru.pdf)

<sup>5</sup> O‘zbekiston Respublikasi Oliy sudi Plenumining “Badanga qasddan shikast yetkazishga oid ishlar bo‘yicha sud amaliyoti to‘g‘risidagi”gi 2007 yil 27 iyundagi 6-sonli qarori. -T.2007.-B1

<sup>6</sup> O‘zbekiston Respublikasining Jinoyat-protsessual kodeksi// <https://lex.uz/docs/111460> (Elektron manbaga murojaat qilingan sana: 23.05.2024 y)

- umumiy mehnat qobiliyatining o'n foizdan o'ttiz uch foizgacha turg'un yo'qotilishi<sup>7</sup>.

Badanga o'rtacha og'ir shikast yetkazishning obyekti, uning holati va xususiy fazilatlaridan qat'i nazar, o'zga kishining sog'lig'idir. Jismoniy daxlsizlik shaxs sog'lig'iga zarar yetkazish bilan bog'liq bo'limgan boshqa zo'ravonlikdaki harakatlarining obyekti bo'la olmaydi.

Sog'liqqa zarar yetkazilganligini aniqlashda, uning badanga shikast yetkazilgan paytdagi holatiga, ya'ni gap sog'liqning yomonlashuviga asoslanish kerak bo'ladi. Sud tibbiyoti va sud amaliyotida sodir etilgan qilmish natijasida sog'liq avvalgiga nisbatan yomonlashgan bo'lsa, jabrlanuvchi sog'lig'iga zarar yetkazilganligini qayd etishga amal qiladi.

Badanga yetkazilgan o'rtacha og'ir shikastalar og'ir shikastalikdan avvalo shunisi bilan farqlanadiki, ular hayot uchun xavfli bo'lmaydi va odatda ular tufayli o'lim yuz bermaydi.

Yuqoridagilar badanga yetkazilgan o'rtacha og'ir shikastning zaruriy belgisidir.

O'rtacha og'ir tan jarohatlari odamning sog'lig'iga ancha ziyon yetkazishi mumkin, lekin ular a'zoning yo'qotilishiga yoki og'ir tan jarohatlari uchun xos bo'lgan boshqa oqibatlarga sabab bo'lmaydi.

Badanga yetkazilgan o'rtacha og'ir shikastlarning asosiy belgilari quyidagilardir:

Sog'liqning uzoq vaqt, ya'ni kamida yigirma bir kun, ammo to'rt oydan ko'p bo'limgan davrda yomonlashuvi tushuniladi.

Umumiy mehnat qobiliyatining ya'ni, o'n foizdan o'ttiz uch foizgacha yo'qotilishi tushuniladi. Umumiy mehnat qobiliyatining o'n foizidan o'ttiz uch foizigacha yo'qotilishi badanga yetkazilgan o'rtacha og'ir shikastning mustaqil belgisi hisoblanadi.

Amaliyotda sog'liqning yomonlashuvi qancha davom etganligi mehnatga qobiliyatsizlik varaqasi asosida, ko'pincha esa jabrlanuvchining kasalxonada yotib davolanishi qancha davom etgani haqidagi ma'lumotnomasi asosida ham aniqlanadi. Ammo bu unchalik to'g'ri emas, chunki bu hujjatlarda badanga yetkazilgan shikast tufayli sog'liqning yomonlashuvi qancha davom etganligi hamisha ham to'g'ri qayd etilmaydi. Negaki, kasallik varaqasi bilan tasdiqlangan qobiliyatsizlikning davom etish muddati hamisha ham yetkazilgan shikast bilan bog'liq bo'lavermaydi va boshqa holatlar: bir vaqtda qo'zg'algan boshqa kasalliki, jabrlanuvchining kasbiy xususiyatlari (oshpaz, qandolatchining qo'lida chaqa joylar borligi va x.k.) bilan bog'liq bo'lishi mumkin. Aksincha, jabrlanuvchining o'z iltimosiga ko'ra kasalik varaqasi barvaqt yopilib, u to'la sog'aymasdan ishga chiqib ketadigan holatlar ham bo'lishi mumkin. Shu sababdan sog'liqning uzoq vaqt yomonlashuviga olib kelgan aybdorning qilmishi Jinoyat kodeksi 105-moddasi bilan kvalifikatsiya qilinganida, sog'liqning yomonlashuv muddati O'zbekiston Respublikasi JPKga muvofiq sud-tibbiyot ekspertizasi xulosasi asosida aniqlanmog'i lozim<sup>8</sup>.

Agar qasddan badanga o'rtacha og'ir shikast yetkazish:

- a) ikki yoki undan ortiq shaxsga nisbatan;
- b) homiladorligi aybdorga ayon bo'lgan ayolga nisbatan;
- v) o'z xizmat yoki fuqarolik burchini bajarishi munosabati bilan shaxsga yoki uning yaqin qarindoshlariga nisbatan;
- g) o'ta shafqatsizlik bilan;

<sup>7</sup> O'zbekiston Respublikasi Sog'liqni saqlash vazirining 2012 yil 1 iyundagi 153 sonli buyrug'i.

<sup>8</sup> Rustambayev M.X. O'zbekiston Respublikasining Jinoyat kodeksiga sharhlari. Maxsus qism. Toshkent-2021.

- d) ommaviy tartibsizliklar jarayonida;
- e) tamagirlik niyatida;
- j) millatlararo yoki irqi yadovat zamirida;
- z) diniy taassublar zamirida;
- i) bir guruh shaxslar yoki uyushgan guruh a'zosi tomonidan yoxud shu guruh manfaatlarini ko'zlab;

k) takroran, xavfli retsidiivist yoki ilgari JKning 104-moddasida nazarda tutilgan qasddan badanga og'ir shikast yetkazish jinoyatini sodir etgan yoxud JKning 97-moddasida nazarda tutilgan qasddan odam o'ldirish jinoyatini sodir etgan shaxs tomonidan;

l) o'ta xavfli retsidiivist tomonidan sodir etilganda JK 105- moddasining ikkinchi qismining tegishli bandiga muvofiq kvalifikatsiya qilinadi.

Badanga shikast yetkazishning obyekti – salomatligining holati va shaxsiy xislatlaridan qat'i nazar, boshqa odamning sog'lig'idir. Badanning daxlsizligi shaxs sog'lig'iga zarar yetkazish bilan bog'liq bo'lmanan boshqa zo'ravonlik tajovuzlarining ham obyekti hisoblanadi.

Boshqa odam sog'lig'iga zarar yetkazish faktini aniqlashda, jabrlanuvchining badaniga shikast yetgan paytdagi salomatligi holatidan kelib chiqish lozim.

O'zining sog'lig'iga ziyon yetkazgan shaxs (o'zining biror a'zosini jarohatlash), mazkur harakatlar faqat JKda ko'zda tutilgan mustaqil jinoyatni vujudga keltirsa, o'zining biror a'zosini mayib qilish bilan yoki boshqa usul bilan harbiy xizmatdan bo'yin tovlash va ba'zi boshqa holatlarda jinoiy javobgarlikka tortilishi mumkin. Bunday holatlarda o'z sog'lig'iga zarar yetkazish (jarohat yetkazish) yuqoridaagi jinoyatlarning zaruriy yoki javobgarlikni og'irlashtiruvchi holat belgisi sifatida namoyon bo'ladi, shu boisdan bunday qilmishlarni boshqa odamning sog'lig'iga qarshi jinoyat sifatida kvalifikatsiya qilish mumkin emas. Agar shaxsning sog'lig'iga ziyon yetkazish uning o'z roziligi bilan boshqa kishi tomonidan sodir etilgan bo'lsa, u holda aybdorning harakatlari jinoyatlar majmui bo'yicha badanga tegishli darajada shikast yetkazish hamda o'z sog'lig'iga zarar yetkazishga rozilik bergen shaxsning sodir etgan jinoyatda ishtirokchiligi sifatida kvalifikatsiya qilinishi mumkin. Agar shaxs noqonuniy tarzda o'q otar qurolni yasagan yoki qo'lga kiritgan bo'lsa-yu, boshqa odamning badaniga shu quroldan shikast yetkazsa, u holda bunday qilmish badanga tegishli og'irlik darajasida shikast yetkazish va qurol, o'q-dorilar, portlovchi moddalar yoki portlatish qurilmalariga qonunga xilof ravishda egalik qilish majmui bilan kvalifikatsiya qilinishi zarur.

Badanga shikast yetkazishni tugallangan jinoyat deb topish uchun qonunda aniq ko'rsatilgan muayyan oqibatlar boshlanishi zarur. Ayni paytda inson badanidagi to'qimalarning anatomik yaxlitligi buzilishigina emas, balki sog'liqqa yetkazilgan muayyan zararni ham badanga shikast yetkazishning yuqoridaagi turlarining jinoiy oqibatlari deb hisoblash kerak.

JK 105-moddasi bo'yicha javobgarlik boshlanishining muqarrar sharti – sodir etilgan ijtimoiy xavfli qilmish va boshlangan jinoiy oqibat (badanga o'rtacha og'ir shikast yetkazish) o'rtasidagi sababiy bog'lanishni aniqlashdir.

Sababiy bog'lanish bo'lmanan holatda vujudga kelgan oqibatlar shaxsni aybdor deb topishga monelik qiladi. Sababiy bog'lanish mavjudligi masalasini hal qilish uchun jabrlanuvchi badanining o'ziga xos xususiyatlari (kasallik, tug'ma yetishmovchilik va boshqalar) inobatga olinishi zarur. Mazkur xususiyatlarning mavjudligi ijtimoiy xavfli qilmish tufayli boshlangan

oqibatlar mohiyatiga ta'sir etishi mumkin. Bunday holatlarda ijtimoiy xavfli qilmish natijasida qanday aniq oqibatlar boshlanganligini va ular jabrlanuvchi badanining o'ziga xos xususiyatlari bilan og'irlashgan - og'irlashmaganligini aniqlash zarur. Basharti mazkur oqibatlar aybdorga ma'lum bo'lsa-yu, u o'zi sodir etayotgan qilmish pirovard natijaga ta'sir etishini anglasa, amalda jabrlanuvchiga keltirilgan zarar unga ayb sifatida yuklatilishi shart. Bunday vaziyatlar aybdor qasdi natijasida sodir etilmagan bo'lsa, u boshlangan oqibatlar uchun javobgarlikka tortilishi mumkin emas.

Subyektiv tomondan qasddan badanga o'rtacha og'ir shikast yetkazish aybning qasd shakli bilan tavsiflanadi va muayyan holatlarga ko'ra to'g'ri yoki egri qasd bilan yetkazilgan bo'lishi mumkin. Aniq bo'lman qasdning mavjudligi holatida aybdor amalda kelib chiqqan oqibatlar uchun javobgarlikka tortiladi. Aybdorning boshqa shaxsnинг sog'lig'iga zarar yetkazish niyati aniqlansa va amalda kam darajadagi zarar yetkazilsa, subyektning harakati jabrlanuvchining sog'lig'iga qarshi zarar yetkazishga suiqasd qilganlik bo'yicha kvalifikatsiya qilinadi.

Qasddan badanga o'rtacha og'ir shikast yetkazish jinoyatining subyekti 16 yoshga to'lgan shaxs aqli raso shaxs hisoblanadi.

Qasddan badanga o'rtacha og'ir shikast yetkazish jinoyatini nazariy jihatdan yoritar ekanmiz, bunda avvalo quydagilarga e'tibor qaratishimiz lozim. Badanga shikast yetkazish deganda, boshqa odamning erkiga qarshi sodir etilgan, uning to'qimalari yoki a'zolarining anatomik yaxlitligi yoki fiziologik vazifalari, tashqi muhit ta'siri ostida buzilishida ifodalangan sog'lig'iga huquqqa xilof ravishda zarar yetkazishni tushunish lozim<sup>9</sup>.

Boshqa odam sog'lig'iga zarar yetkazish faktini aniqlashda, jabrlanuvchining badaniga shikast yetgan paytda uning salomatligi holatidan kelib chiqish lozim. Sud tibbiyoti va sud amaliyoti, agar sodir etilgan qilmish natijasida sog'liq holati uning boshlang'ich holatiga nisbatan yomon bo'lsa, jabrlanuvchinig sog'lig'iga zarar yetkazilganligini qayd etish lozimligi to'g'risidagi qoidaga amal qiladi.

Badanga shikast yetkazish quyidagi vositalar orqali amalga oshirilishi mumkin:

- jismoniy ta'sir (mexanik, termik, elektr va hokazo);
- ruhiy ta'sir ko'rsatish;
- badanga kimyoiy yoki biologik faol moddalar bilan ta'sir etish (turli kislotalar, zararli moddalar, gazlar va hokazolardan foydalanish).

Darhaqiqat, badanga shikast yetkazishning tushunchasini yoritib berishda turlicha qarashlar mavjud bo'lib, birinchidan, badanga shikast yetkazishlarning obyektini turlicha ta'riflashda (ba'zilar bunday obyekt sifatida sog'liqni belgilagan bo'lsalar, boshqalar jismoniy daxlsizlikni belgilaganlar); ikkinchidan, urish, do'pposlash, qiyashlarni badanga shikast yetkazishlar jumlasiga kiritish mumkinligidan iborat bo'lgan, uchinchidan, bular jumlasiga og'riq beruvchi, ammo boshqa oqibatlarni keltirib chiqarmaydigan zo'rlik ishlatib qilingan boshqa harakatlarni kiritish mumkinligidan iborat<sup>10</sup>.

Badanga shikast yetkazishni tugallangan jinoyat deb topish uchun muayyan qonunda aniq

<sup>9</sup> O'zbekiston Respublikasi Oliy sudi Plenumining "Badanga qasddan shikast yetkazishga oid ishlar bo'yicha sud amaliyoti to'g'risidagi"gi 2007 yil 27 iyundagi 6-soni qarori.

<sup>10</sup> Rustambayev M.H. O'zbekiston Respublikasi jinoyat huquqi kursi. 3-tom. Toshkent-2018. -115-b.

ko'rsatilgan oqibatlarning yuzaga kelishi zarur<sup>11</sup>.

Tibbiyot nuqtayi-nazaridan odamga tashqi muhitning turli omillarining ta'siri natijasida vujudga kelgan a'zo va to'qimalarning anatomik butunligi va fiziologik faoliyatining buzilishi tan jarohati sifatida tushuniladi.<sup>12</sup>

«Badanga shikast yetkazishga oid ishlar bo'yicha qilmishni to'g'ri kvalifikatsiya qilish uchun ayb shakli, badanga shikast yetkazish motivi, maqsadi va usuli, aybdorning qilmishi bilan kelib chiqqan oqibat o'rtasida sababiy bog'lanish mavjudligi, shuningdek, ishning to'g'ri hal etilishi va aybdorgaadolatli jazo belgilanishi uchun ahamiyatli bo'lgan boshqa holatlar batafsil aniqlanishi lozim»<sup>13</sup>.

Tahlil etayotgan jinoyatlarimiz O'zbekiston Respublikasi Jinoyat kodeksida I-bo'lim II-bob «Sog'liqqa qarshi jinoyatlar»da joylashgan bo'lib, u 105-moddada 2-qismdan iborat shaklda o'z ifodasini topgan.

Ushbu moddaning ikkinchi qismi «i» bandi bilan javobgarlikka tortish uchun o'rtacha og'ir shikast yetkazish jinoyati bir guruh shaxslar yoki uyushgan guruh a'zosi tomonidan yoxud shu manfaatlarini ko'zlab sodir etilganligi aniqlanishi lozim.

Bunda bir guruh shaxslar tomonidan qasddan badanga o'rtacha og'ir shikast yetkazishni batafsilroq ko'rib chiqamiz.

Umumiylarda jinoyatni bir guruh shaxslar, uyushgan guruh yoki jinoiy uyushma tomonidan sodir etilishi jinoyat huquqida jinoyatda ishtirokchilik sifatida o'rGANILADI. Jinoyat kodeksining 27-moddasiga ko'ra, ikki yoki undan ortiq shaxsning qasddan jinoyat sodir etishda birgalashib qatnashishi ishtirokchilik deb topiladi.

Ishtirokchilikda sodir etiladigan jinoyatlar o'z huquqiy xususiyatlariga ega bo'lib, u yoki bu jinoyatni kvalifikatsiya qilishda nafaqat qilmishning ishtirokchilikda sodir etilishi, balki, qonuniylik vaadolatlik prinsiplariga asoslangan holda aniq belgilar va shakllarga e'tibor berish lozim.

Ishtirokchilikning quyidagi alomatlarini qayd etish mumkin:

- ayni bir jinoyatda ikki yoki undan ortiq shaxsning ishtiroki;
- guruh a'zolarining birgalikda harakat qilishi;
- jinoyatning qasddan sodir etilishi.

Ushbu belgilar bir guruh shaxslar tomonidan qasddan badanga o'rtacha og'ir shikast yetkazish jinoyatiga ham bevosita taalluqlidir.

Ma'lumki, Jinoyat kodeksining 28-moddasida jinoyat ishtirokchilarining turlari keltirilgan.

Unga ko'ra jinoyatda ishtirokchilar bajaruvchi, tashkilotchi, dalolatchi va yordamchi hisoblanadi.

Jinoyatni bevosita to'la yoki qisman sodir etgan yoxud Jinoyat kodeksiga muvofiq javobgarlikka tortilishi mumkin bo'limgan shaxslardan yoki boshqa vositalardan foydalanib jinoyat sodir etgan shaxs bajaruvchi deb topiladi.

Jinoyatning bajaruvchisi deb, muayyan jinoyat subyektini tavsiflovchi belgilarga ega

<sup>11</sup> Rustambayev M.X. O'zbekiston Respublikasining Jinoyat kodeksiga sharhlar. Maxsus qism. Toshkent-2021.

<sup>12</sup> O'zbekiston Respublikasi Sog'liqni saqlash vazirining 2012 yil 1 iyundagi 153-sonli buyrug'i.

<sup>13</sup> O'zbekiston Respublikasi Oliy sudi Plenumining «Badanga qasddan shikast yetkazishga oid ishlar bo'yicha sud amaliyoti to'g'risida»gi 2007-yil 27-iyun №6-sonli qarori. – T., 2007 – B.11.

bo‘lgan shaxsgina bo‘lishi mumkin, aks holda uning qilmishida jinoyat deb tan olinishi va jinoiy javobgarlikka tortilishi uchun zaruriy shart sifatidagi jinoyat tarkibi mavjud bo‘lmaydi.

Jinoyatni qisman sodir etish – jinoyatning obyektiv tomonini tashkil etuvchi qilmishni sodir etgan bo‘lib, bajaruvchiga bog‘liq bo‘laman holda tamom bo‘lmaydi yoki modda dispozitsiyasida ko‘rsatilgan oqibatning yuz berganligida ifodalanadi.

Jinoyatning obyektiv tomonining jinoiy javobgarlik yoshiga yetmaganlik (JK 17-moddasi) yoki aqliy norasolik (JK 18-moddasi) alomatlari bo‘yicha javobgarlikka tortilishi mumkin bo‘laman shaxslar tomonidan bajarilishi hollariga e’tibor qaratish lozim.

Voyaga yetmaganlarning katta yoshdagilar ishtirokida sodir etgan jinoyatlari haqidagi ish ko‘rib chiqilayotganda katta yoshdagi shaxs va o‘smir o‘rtasidagi o‘zaro munosabatlarning xususiyatini sinchiklab aniqlash zarur, chunki ana shu ma’lumotlar katta kishining voyaga yetmagan shaxsni jinoyat yoki boshqa g‘ayriijtimoiy harakat sodir etishga jalb qilishdagi rolini aniqlashda muhim ahamiyatga ega bo‘lishi mumkin. Bajaruvchi tomonidan sodir etilgan qilmish subyektiv tomonidan to‘g‘ri yoki egri qasd bilan sodir etilishi mumkin.

Jinoyatning tashkilotchisi – jinoyat ishtirokchilari ichida eng xavfli shaxsdir. U jinoyat rahbari bo‘lib, ishtirokchilarni birlashtirishga, jinoiy niyatni amalga oshirish maqsadida ularning tartibli xatti-harakatlarini ta’minalashga intiladi. Tashkilotchi jinoyat rejasini ishlab chiqadi, boshqa ishtirokchilarni tanlaydi, ularning orasida vazifalarini taqsimlaydi, yo‘riq ko‘rsatadi.

Tashkilotchi faqatgina uyushgan guruhi yoki jinoiy uyushma tarkibida emas, balki vazifalar taqsimlanishidagi ishtirokchilikda ham bo‘ladi.

Jinoyat sodir etishga qiziqtirgan, ya’ni qasddan boshqa shaxsda qonun bilan taqilangan muayyan ijtimoiy xavfli qilmish sodir etishga qat’iyat uyg‘otgan shaxs dalolatchi deb ataladi.

Dalolat aniq bir obyekt yoki shaxslarga nisbatan qaratilgan bo‘lishi kerak. Jinoyat sodir etishga da’vat etsa-da, jinoyat aynan qaysi obyektga qarshi qaratilishini ko‘rsatmaydigan shaxs dalolatchi deb topilishi mumkin emas.

Dalolatchilik og‘dirib olish, iltimos qilish, ishontirish, ko‘ndirish, buyruq berish, zo‘rlik ishlatish, aldash va boshqa yo‘llar bilan amalga oshirilishi mumkin.

Ishtirokchilikning yana bir turi yordamchidir. Yordamchi deb maslahatlar berish, jinoyat qurollarini, jinoyat izlarini va vositalarini yoki jinoiy yo‘l bilan topilgan buyumlarni olish yoki sotib berishga oldindan va’da beradigan shaxsga aytildi. Mazkur ta’rifda nafaqat yordamchi faoliyatining yo‘nalishi (jinoyat sodir etishga ko‘maklashish) belgilab berilgan, balki yordamchilarning uslub va vositalari ro‘yxati yuqoridaq qonunda sanab o‘tilganidan boshqa hech bir harakat yordamchilik sifatida tan olinishi mumkin emasligi ko‘rsatilgan.

Jinoiy yordamchilik quyidagilarda ifodalaniladi:

- jinoyat sodir etish uchun bajaruvchiga zarur vositalarni yetkazib berish (masalan, katta miqdordagi mol-mulkni o‘g‘irlash jinoyatini amalga oshirish uchun mashina taqdim etish);
- bajaruvchi sodir etadigan jinoyatga qo‘yilgan to‘siqlarni olib tashlash (masalan, moddiy qimmatliklar omborini talon-toroj qilish uchun ochiq qoldirish).

Qasddan badanga o‘rtacha og‘ir yoki og‘ir shikast yetkazishni bir guruhi shaxslar tomonidan amalga oshirilishi (JK 105-modda 2-qism «i» band) jinoyatda ishtirokchilikning bir ko‘rinishidir.

Bir guruh shaxslar tomonidan qasddan badanga o‘rtacha og‘ir shikast yetkazish Jinoyat kodeksining 105-moddasi 2-qismi «i» bandi bilan kvalifikatsiya qilinadi. Mazkur band oldindan til biriktirgan bir guruh shaxslar tomonidan ham oldindan til biriktirmagan bir guruh shaxslar tomonidan ham qasddan badanga o‘rtacha og‘ir shikast yetkazish hollarida shaxslarning aybiga qo‘llanilishi zarur.